

երիվարի ուրուք յանկարծ առանց իրիք պատճառի, ասէին Սարակինոսք թէ՛ ետես զհովանին Ռիգարտոսի, կացեալ 'ի հեռուստ 'ի վերայ միոյ լերանց Հրէաստանի ետես զքաղաքն Ս. այլ չէր հնար մերձենալ 'ի նա եւ կանգնել մեքենայս 'ի պարիսպ նորին, ուստի դարձաւ յետս հառաջանօք և թախծութեամբ սրտի մռնչելով իրբեւ զառիւծ։

Զի Սալահատտին ամրացուցեալ էր զքաղաքն յամենայն կողմանց, և 'ի պատշաճաւոր տեղւոջ զետեղեալ զբանակ իւր, մնայր գալստեան թշնամւոյն։ Իսկ Լատինք դարձեալ անտի անկան 'ի վերայ զօրաց, որք գային յեգիպտոսէ, որոց զօրավարէր Ֆէլէքէտտին՝ եղբայր Ատիլայ, եւ ընդ նոսա վաճառականք բազումք, կոտորեցին զնոսա 'ի բերան սրոյ, և զայլն ցիր և ցան կացուցին յանապատի անդ, ոմանք դարձան յեգիպտոս, ոմանք կալան զճանապարհն Գերեքի, և այլք հասին առ Սուլթանն մերկ և կողոպուտ, և նորա մխիթարեալ քաջալերեաց զնոսա։ Ռիգարտոս դարձաւ 'ի Յոսպէ լի աւարաւ, եւ անտի մեկնեցաւ 'ի Պտղոմայիս եգեալ 'ի մտի պաշարել զՊերութ։ Տեսեալ զայսոսիկ Սուլթանին գլմեաց և նա ինքն 'ի վերայ Ռեմէի և էառ զնա, բայց ոչ կարաց տիրել ներքին բերդին, և անտի զնացեալ պաշարեաց զՅոսպէ, և կործանեալ զմի կողմն պարսպին՝ մտին 'ի ներքս, եւ 'ի բերան սրոյ կոտորեցին զընդդիմակացան, եւ յաւարի առնուլն զքաղաքն գտին զբեռինս և զաղիս եգիպտական զօրուն, և բարձին զնոսա։ Իսկ ամրացեալքն 'ի բերդին՝ խնդրեցին զերգումն հաւատարմութեան, և ելին առ Սուլթանն Եպիսկոպոս քաղաքին և իշխանքն տալ զգանձս և զամբարս եւ խնդրել վերակացուն, և 'ի տարածամիլ աւուրն, թողին կարգաւորել զգործն 'ի վաղիւն յառաւօտ։ Սակայն 'ի գիշերին յայնմիկ եհաս թագաւորն Անդղիոյ նաւուք 'ի Յոսպէ և եմուտ 'ի բերդն, և ազդ տրար քրիստոնէից հանդարտիլ 'ի տեղիս իւրեանց։ Տրտմութիւն մեծ եղեւ Սուլթանին եւ ապաշաւ անբուժելի, թէ՛ զի՞արդ յապաղեաց տիրել բերդին 'ի գիշերին յայնմիկ, և անտի դարձաւ 'ի Ռեմէ։ Հուսկ ուրեմն խորհեցաւ թագաւորն Անդղիոյ վերջ տալ խռովութեանց և արիւնհեղութեանց, զի ստէպ ստէպ հասանէին յուռկն նորա անախորժ եւ փրասակար զրոյցք։